

PEMBERITAHU PERTANYAAN DEWAN RAKYAT

PERTANYAAN : LISAN
DARIPADA : Tuan Sim Tong Him [Kota Melaka]
TARIKH : 17.6.2014 (SELASA)
NO. SOALAN : 4

Tuan Sim Tong Him [Kota Melaka] minta **MENTERI PENDIDIKAN** menyatakan :-

- (a) jumlah bilangan pelajar yang berjaya diterima masuk ke Matrikulasi untuk tahun 2014 dengan berikan jumlah pelajar mengikut kaum; dan
- (b) apakah kriteria untuk meluluskan permohonan tersebut dan bilangan permohonan yang ditolak.

JAWAPAN:

Tuan Yang Di-Pertua,

- a) Program Matrikulasi Kementerian Pendidikan Malaysia (KPM) pada asasnya diwujudkan lebih sedekad yang lalu (sejak tahun 1998) sebagai **persediaan bagi pelajar Bumiputera** lulusan Sijil Pelajaran Malaysia (SPM) untuk bersaing bagi melayakkan mereka mengikuti kursus peringkat ijazah dalam bidang Sains, Teknologi dan Sastera Ikhtisas di Institusi Pengajian Tinggi Awam (IPTA) dan Institusi Pengajian Tinggi Swasta (IPTS).

Sejak awal penubuhannya hingga **sesi 2002/2003**, Kerajaan memutuskan pengambilan pelajar ke program ini 100% adalah pelajar Bumiputera sahaja. Namun begitu, pada **29 Mei 2002** kerajaan telah bersetuju supaya **10%** daripada tempat dalam Program Matrikulasi dibuka kepada pelajar bukan

Bumiputera. Langkah yang dilakukan ini bertujuan untuk memberi peluang serta mewujudkan persaingan yang sihat dalam kalangan penuntut Bumiputera dan bukan Bumiputera.

Untuk makluman Ahli Yang Berhormat, program berbentuk *fast-track* ini kian menjadi rebutan dalam kalangan pelajar lepasan SPM setiap tahun. Pada **sesi 2014/2015**, seramai **109,150 pelajar** lulusan SPM telah memohon untuk mengikuti program ini dalam Jurusan Sains dan Jurusan Perakaunan. Daripada jumlah tersebut, seramai **86,684 (79.42%)** orang adalah pelajar bumiputera (bumiputera semenanjung, Sabah dan Sarawak) manakala selebihnya **22,466 (20.58%)** adalah pelajar Bukan Bumiputera dengan pecahan **15,180** orang pelajar kaum Cina, **6,136** orang pelajar kaum India dan **1,150** orang lain-lain kaum.

Walau bagaimanapun, hanya **28,000** tempat sahaja disediakan dengan agihan **10%** kepada pelajar Bukan Bumiputera dan selebihnya **90%** diperuntukkan kepada pelajar Bumiputera telah mendaftar di 15 buah kolej matrikulasi, **mulai 19 Mei 2014** bagi ambilan pertama dan **12 Jun 2014** bagi ambilan kedua.

Memandangkan ambilan kedua baru sahaja selesai pada minggu lalu jumlah sebenar belum dapat dipastikan kerana data belum stabil. Walau bagaimanapun berdasarkan pengambilan tahun 2013, seramai 21,814 orang pelajar bumiputera, dan 2,435 pelajar bukan bumiputera telah mendaftar (1,142 pelajar kaum India, 1212 pelajar kaum Cina dan 81 orang lain-lain kaum).

Tuan Yang Di Pertua,

- b) Setiap tahun terdapat peningkatan pelajar yang memperoleh keputusan cemerlang dalam SPM. Justeru, wujud persaingan yang sangat tinggi dalam kalangan pelajar cemerlang SPM ke Program Matrikulasi. Peningkatan

sedemikian sangat sihat bagi negara, walau bagaimanapun bagi segelintir ibu bapa melihatnya sebagai sekatan kepada anak mereka melanjutkan pengajian.

Hal yang demikian telah menyebabkan syak wasangka dalam kalangan ibu bapa kepada pemilihan pelajar ke Program Matrikulasi. Sejak tahun 2006, Kementerian telah mendasarkan kriteria-kriteria berikut dalam pemilihan pelajar ke program ini:

- i. Hanya calon yang **memohon dan melepasi syarat kelayakan minimum** layak dipertimbangkan ke Program Matrikulasi; sebagai contoh seramai 78,005 pelajar yang mempunyai syarat yang cukup tetapi tidak memohon ke Program Matrikulasi.
- ii. Pemilihan pelajar adalah melalui **sistem meritokrasi** iaitu gabungan **90% akademik** dan **10% kokurikulum** [akademik – hanya empat (4) mata pelajaran sahaja dikira dan kokurikulum – purata markah dari tingkatan satu (1) hingga tingkatan lima (5)];
- iii. Gred 4 mata pelajaran tersebut diberi nilai dan kemudiannya dijumlahkan dengan markah kokurikulum;
- iv. Gabungan markah ini ialah nilai merit pelajar yang kemudiannya disusun mengikut **ranking**;
- v. Berdasarkan **ranking** dan permohonan, pelajar ditawarkan ke **Jurusan Sains dan Jurusan Perakaunan** berdasarkan tempat yang disediakan;
- vi. Pengambilan **HANYA** dibuat sebanyak **dua kali sahaja**. Sekiranya jumlah pelajar yang mendaftar pada ambilan pertama kurang **MAKA** tawaran kedua dibuat berdasarkan kekosongan tempat, jurusan dan kuota;

- vii. Program ini merupakan **program fast-track** yang tertakluk sepenuhnya kepada prinsip dan pelaksanaan **sistem pengajian semester**. Justeru **tiada ambilan ketiga** dibuat; dan
- viii. Semua pelajar ditempatkan secara merata berdasarkan keseimbangan kaum dan negeri di semua kolej matrikulasi atas konsep Gagasan 1Malaysia.

Untuk makluman Ahli Yang Berhormat, terdapat seramai **7083 pelajar** yang mempunyai keputusan SPM cemerlang (**9A – 11A**) tetapi tidak diterima kerana mempunyai markah kokurikulum yang rendah. Justeru, pemilihan pelajar ke Program Matrikulasi bukan hanya terletak kepada kecemerlangan keputusan SPM tetapi juga kecemerlangan pelajar dalam kokurikulum seawal Tingkatan 1 hingga Tingkatan 5.